

INUIT ATAQATIGIIT

Inatsisartuni



16. august 2024

UKA2024/55

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Nunatsinni umiartortunngorniarnermi ilinniarfusinnaasut suulluunniit tamarmik illoqarfimmut ataatsimut, ilinniarfimmullu ataatsimut ataatsimuulersinneqassagaluarpata pitsaaqutigisinnaasaanik pitsaanngequtigisinnaasaanillu aammalu aningaasatigut kingunerisinnasaanik misissueqqillugit Naalakkersuisut peqquneqarnissaannik Inatsisartut aalajangiiffigisassassaattut siunnersuut. Maskinmesterinngorniartarnerup imarsiornernermik ilinniarfiup iluanilernissaa soorlutaaq nunatsinni umiarsuup naalagaatut ilinniartitsisoqartalersinnaanera misissugassanut ilaassaaq. Misissuineq naammassereersimassaaq UKA25 sioqqullugu.

(Inatsisartunut ilaasortaq, Peter Olsen, Inuit Ataqatigiit)

Tunngavilersuut:

Nunatta oqaluttuarisaanerani nutaanerusumi, ineriartornerup iluani, sutigut tamatigut isiginnaartuuginnarsimanerput allannngortikkumallugu 1979-mi namminersornerulerpugut aammalu 2009-mi namminersulersimalluta. Namminersornerulerpugut, Namminersulersimallutalu siunertaralugu anguniarlutigulu nunatta ineriartortitaaneranut isiginnaartuuginnarusunnata, nunarpulli nammineq aqussinnaalerumallugu, akisussaaffimmillu annerusumik tigusaqarusulluta.

Nunatta iluani aqutsinikkut, inuussutissarsiornikkut, minnerunngitsumillu ilinniartitaanikkut.

Ullumikkullu killiffippu qiviassagutsigu, Namminersornerulersimanitsinniit ukiut 45-rut qaangiunneranni, immitsinnut aperisariaqarpugut, suvugut sumullu killippugut? Siunertarput anguniagarpullugu angusimanerparput? Aap, suliarpassuaqarlutalu angusarpassuaqarsimavugut, taamaattorli suli sukataarnerusinnaanerput ilungersornerusinnaanerpullu nassuerutigisariaqarparput.

Pingaartumik imarsiornerup iluani ilinniartitaanikkut suli annerusumik sukataarnerunissarput angusaqarnerusariaqarnerpullu nassuerutigisariaqarparput.

Tamanna arlatitsigut uppernarsaatissartaqarpoq. Assersuutigiinnarsinnaavarput Sermitsiaq AG-ip nittartagaani ulloq 13.december 2018-mi ilaatigut ima allasimasoqarpoq:

”Kalaallit Nunaanni inuit ikippallaarpugut. Nunasiortornerq allamiullu amerlanerit inuiaqatigiinnut tapertaasinnaasut pisariaqartippavut. Royal Greenlandip pisortaaneranit, Mikael Thinghuus-imit oqariartuut taama nipeqarpoq. Taassuma tikkuarpaa, Royal Greenlandimut kilisaatini aqumiunik Savalimmiormiunik atuisinnaaneq pingaartuusoq, kalaallinik ilinniarsimasunik amigaateqarmat”

Issuaaneq naavoq.

Ajoraluartumillu maani nunatsinni umiarsuarnut naalaganngorniarnissaaneq periarfissaanngilaq.

INUIT ATAQATIGIIT

Inatsisartuni



Nunatsinni imarsiornikkut ilinniarfiusinnaasoq qaffasinnerpaaq tassaavoq fiskeskipper 1.grad. Umiarsuarnullu naalagannorniarsinnaaneq fiskeskipper 1.grad-miit qaffasinneruvoq. Tamanna ersersinneqarpoq 2019-mi upernaakkut ataatsimiinnermi apeqquteqaat aallaavigalugu oqallisissiarisimasanni uani: UPA2019 imm. 225-mi.

Tassani ilaatigut paasinarsivoq kilisaatini anginerni naalagaasoq amerlanertigut umiarsuit naalagaattut ilinniarsimasuusartoq.

Apeqquteqaat aallaavigalugu oqallinnermi Naalakkersuisut akissuteqaataanni ilaatigut ima allassimasoqarpoq:

“Uanilu umiarsuit naalagaattut maskinmesteritullu ilinniarnert Nunatsinni neqeroorutaanninnerat malugeqquneqarpoq. Umiarsuit naalagaattut ilinniarneq fiskeskipperit 1. gradimik ilinniarnertup qummut tulleraa. Kilisaatini anginerni umiarsuarmi naalagaasoq amerlanertigut umiarsuit naalagaattut ilinniarsimasuusarpoq.”

Naak Mikael Thinghuusip oqaatigisaa ukiut arfinillit matuma siorna pisimagaluartoq aammalu naak 2022-mi Mikael Thinghuus pisortaanertut tunuareernikuugaluartoq aammalu apeqquteqaat aallaavigalugu oqallisissiaq ukiut tallimat matuma siornali pisimagaluartoq, taamaattoq imarsiornikkut ilinniartitaanerup iluani pissutsit sulii allanngorpallaarsimangillat. Aap, maskinmesterinngorniartarneq Sisimiunut nuunneqarsimalerpoq, taamaattoq sulii umiarsuup naalagannorniartarneq sulii nunatsinni periarfissaalersimangilaq.

Tamanna pillugu isumaqarpunga piffissanngortoq nunatsinni umiarsuit naalagaattut ilinniarsinnaanerup periarfissalersinneqarnissaa. Minnerunngitsumillu Savalimmiumi maskinmesterinngorniartarneq imarsiornermik ilinniarfiup ataaniinnerata pitsaaquteqarnera aamma tikeraarnitsinni 2022-mi paasisatta ilagaat. Soqutiginaq, taamaattumik paaserusunnarpoq nunatsinni aamma taamaaliortoqarsinnaanersoq.

Nunatsinni inuussutissarsiutitsinni pingaarnepaavoq aalisarneq. Aalisarneq uagut nammineerluta sukkut tamatigut peqataaffiginerusariaqalerparput. Kilisaatini inuttaasut, aqumiut, kilisaassuarnilu aquttut amerlanerpaartaat kalaaliusaqariarput: Kilisaatinilu tamani inuttaasut amerlanerpaartaat kalaallinit inuttalersorneqassappata, pingaaruteqarluinnaqqissaarpoq nunatsinni imarsiornermik ilinniarfiup ilinniartitaanikkut ullutsinnut naleqqussaavigineqarnissaa.

Taamaattumik imaattumik aaliangiiffissatut siunnersuuteqarpunga; **Nunatsinni umiartortunngorniarnermi ilinniarfiusinnaasut suulluunniit tamarmik illoqarfimmut ataatsimut, ilinniarfimmullu ataatsimut ataatsimuulersinneqassagaluarpata pitsaaqutigisinnaasaanik pitsaanngequtigisinnaasaanillu aammalu aningaasatigut kingunerisinnasaanik misissueqqillugit Naalakkersuisut peqquneqarnissaannik Inatsisartut aalajangiiffigisassassaattut siunnersuut. Maskinmesterinngorniartarneq imarsiornernermik ilinniarfiup iluanilernissaa soorluttaaq nunatsinni umiarsuup naalagaattut ilinniartitsisoqartalersinnaanera misissugassanut ilaassaaq. Misissuineq naammassereersimassaaq UKA25 sioqqullugu.**

Nuannersumik angusaqarfiulluurtumillu oqallittoqarnissaannik kissaassillunga.

INUIT ATAQATIGIIT

Inatsisartuni



Qujanaq

§ 37 naapertorlugu apeqquteqaat takuuk: 149/2024

Pisortanut aningaasatigut allaffissornikkullu kingunerisassai:

Misissuinissamut ningaasartuutissat 500.000 koruunit qaangernissaat naatsorsuutigineqanngilaq. Naatsorsuutigineqarpoq Naalakkersuisut aki eqqaaneqartup iluani attuumassuteqartunut attaveqarnermut, ataatsimiinnernut, aaqqissuunnernut, suliamut aammalu innersuussutit tigussaasunut suliaqarnissamut sulisunik atorfinitsitsisinissamut periarfissaqassasut.

Namminersortunut aningaasaatigut allaffissornikkullu kingunerisassai:

Soqanngilaq.

Innuttaasunut aningaasatigut allaffissornikkullu kingunerisassai:

Soqanngilaq